

IV. Joannis Keill ex *Æde Christi Oxon. A. M.*  
*Epistola ad Cl. virum Gulielmum Cockburn,*  
*Medicinæ Doctorem. In qua Leges Attractionis*  
*aliaque Physices Principia traduntur.*

CUM summâ benevolentia, & non vulgari Amicitia me complexus sis, Iniquus essem, vir ornatissime, nisi conarer aliquam tibi vicissim referre gratiam. Theoremata igitur hæc, quibus non modo rem Physicam sed & Medicam aliquatenus illustrari posse arbitror, ad te mitto; munus, uti quibusdam fortasse videri potest, perexiguum, Tibi tamen & gratissimum fore spero, & non parvi æstimandum. Cum enim tum Philosophiam Mechanicam penitus perspexeris, & in Praxi Medicâ felicissimè sis versatus; tum etiam utrique promovendæ gnâviter incumbas, Gratissima sine dubio tibi erunt vera Medicinæ Principia, quoniam optime intelligis, quam periculosi ex falsis oriantur errores. Hæc igitur Theoremata tibi, Vir Clarissime, in manus trado, tuoque arbitrio libens permitto.

Ponenda sunt fundamenti loco hæc tria, quibus omnis Physice innititur, principia. 1. Spatium inane. 2. Quantitatis in infinitum divisibilitas. 3. Materię vis Attractrix, Dari spatium inane constat ex motu corporum. Quantitatis in infinitum divisibilitatem ex continuæ quantitatis naturâ demonstrant Geometræ. Materię inesse vim attractricem confirmat experientia. Ex duobus primis principiis sequitur

T H E O R

## T H E O R E M A I.

*Materiae exigua quaelibet particula potest ita spatium quantumvis magnum occupare, ut pororum seu omnium meatuum diametri sint data recta minores, vel ut particulae omnes sint à se invicem remotae intervallo data recta minore.*

## T H E O R. II.

*Dari possunt duo corpora mole aequalia, at pondere seu densitate (id est quantitate materiae) utcunque inaequalia, in quibus erunt meatuum seu pororum summae fere aequales.*

Sit V. G. digitus cubicus alter auri, alter aeris: quamvis materia in cubo aureo vicies millies superat materiam in cubo aereo, fieri tamen potest ut spatia vacua in digito cubico auri sint fere aequalia spatiis vacuis in digito cubico aeris, scil. ut auri vacuitates sint ad vacuitates aeris ut 999999 ad 1000000.

## T H E O R. III.

*Particulae quae aquam vel aerem vel alia ejusmodi fluida constituunt (si modo se tangant) non sunt absolute solidae, sed ex aliis compositae particulis multis meatibus & poros intra se continentibus.*

Particulae corporum minimae & absolute solidae, hoc est vacui omnino expertes, vocentur primae compositionis; Moleculae ex pluribus hisce particulis coalescentibus ortae vocentur particulae secundae compositionis; Moles ex pluribus moleculis coeuntibus conflatae, vocentur particulae tertiae compositionis; & sic deinceps, donec tandem

dem perventum fuerit ad particulas, è quibus corporum fit ultima compositio, & in quas eorundem fit prima resolutio.

Materiæ inesse vim Attractricem, quâ omnis materiæ particula trahit ad se omnem aliam materiæ particulam, & vicissim trahitur, primus ex Phænomenis collegit Dominus Isaacus Newtonus. Vis hæc datâ materiâ in diversis distantiiis reciprocè proportionalis est quadratis distantiarum ; ex quâ oritur vis illa quam Gravitationem dicimus, quâ corpora omnia terrestria ad terram rectâ feruntur, estque pondus corporum quantitati materiæ semper proportionale. Prolatâ hæc, quam ipse primus detexit, Materiæ vi Attractrice omnes Planetarum motus cometarumque Phases pulcherrimè explicavit, Physicamque cælestem, ab iis quæ tot retro fluxerunt sæculis vix dum inchoatam, felicissimè consummavit Dominus Newtonus ; vir ingenio pene supra humanam sortem admirabili, dignusque cujus fama per omnes terras pervagata, cœli quos descripsit meatibus permaneat cœva.

Divina sagacissimi viri inventa sæpenumero mecum recolens, in eam tandem cogitationem incidi, principium quoddam Newtoniano non absimile, ad Phænomena terrestria explicanda, adhiberi posse. Post iterata sæpius experimenta, materiæ Terrestri inesse deprehendi vim quamdam attractricem, ex qua plurimorum Phænomenon ratio petenda est ; Meaque hæc de re cogitata, abhinc quinquennio, Domino Newtono indicavi ; ex eo autem intellexi, eadem fere, quæ ipse investigaveram, sibi diu ante animadversa fuisse. Quæstiones aliquot ad hanc vim attractricem spectantes, sub finem Optices abhinc biennio Latine editæ, proposuit Dominus Newtonus ; quem cum istiusmodi studia ulterius excolere ætas ingravescens, & alia negotia vetant, tanti viri vestigiis insistere, eumque longo licet intervallo sequi, haud alienum duxi. Impresæntiarum nuda quædam proponam Theoremata, quæ  
fortasse

fortasse aliquando fusius enunciata & demonstrata, justo volumine sum traditurus.

#### T H E O R. IV.

*Præter vim illam Attrahtricem, quâ Planetarum Cometa-  
rumque corpora, in propriis orbitis retinentur, alia eti-  
am inest materiæ potentia, quâ singulæ, ex quibus illa  
constat, particulæ se invicem attrahunt, & reciproce à  
se invicem attrahuntur: quæ vis decrescit in majore quam  
duplicatâ ratione distantie augescens.*

Theorema hoc multis potest probari experimentis; at ratio quâ minuitur vis illa, dum à se invicem recedunt particulæ, num scilicet sit triplicata, quadruplicata, vel alia quævis distantiarum augescens ratio, quæ major sit duplicatâ, nondum æquè per experimenta patet; erit fortasse aliquando tempus, cum accuratiore adhibita diligentiâ innotescet.

#### T H E O R. V.

*Si corpus constet ex particulis, quarum singulæ vi polent at-  
trahtrice, in triplicatâ vel plusquam triplicatâ ratione  
distantiarum decrescente; erit vis qua ab eo corpore  
urgetur corpusculum, in ipso contactu, vel intervallo à  
contactu infinite exiguo, infinite major, quam si cor-  
pusculum illud ad datam à dicto corpore distantiam  
locaretur.\**

\* Vide Prop.  
80. & 91.  
Princip.  
Newtoni.

#### T H E O R. VI.

*Hisdem positis, si vis illa attractiva in assignabili distantia,  
ad Gravitationem obtineat rationem finitam; eadem in  
ipso contactu, vel in distantia infinite parva, vi Gra-  
vitatatis erit infinite major.*

T H E O R.

## T H E O R. VII.

*Si verò in ipso contactu, vis corporum Attractiva ad Gravitationem obtineat rationem finitam, eadem in omni distantia assignabili est vi gravitatis infinite minor, adeoque evanescit.*

## T H E O R. VIII.

*Vis Attractiva, qua pollent singulæ materiæ particule in ipso contactu, vim gravitatis prope in immensum superat; non tamen est vi Gravitatis infinite major; adeoque, in data distantia, vis illa evanescet.*

Vis igitur hæc materiæ superaddita, non nisi per spatia admodum perexigua diffunditur; in majoribus distantis prorsus nulla est; unde motus corporum Cœlestium. (quæ longis intervallis à se invicem disjuncta sunt) per vim hanc Attractivam nullâ ratione turbari possunt, sed eâdem ratione continuó peraguntur, ac si vis illa à corporibus iis prorsus abesset.

## T H E O R. IX.

*Si corpusculum aliquod corpus tangat, vis qui urgetur illud corpusculum, hoc est, vis qua cum eo corpore cohæret, erit quantitati contactûs proportionalis; nam partes à contactu remotiores nihil conferunt ad cohærentiam.*

Adeoque pro vario particularum contactu variâ orientur cohærentiæ gradus; omnium autem maximæ sunt vires cohærentiæ, quando superficies, in quibus se invicem tangunt corpora, planæ existunt; quo in casu, cæteris

P

paribus,

paribus, vis quâ corpusculum cum aliis cohæret, erit ut superficierum partes sese tangentes.

Hinc patet ratio, cur duo marmora exactissimè polita, & sese secundum superficies planas tangentia, à se invicem divelli non possunt, nisi à pondere, quod Gravitatem Aëris incumbentis multùm superat.

Hinc etiam decantatissimi istius Problematis, de cohærentia materiæ, solutio elici potest.

### T H E O R. X.


*Ea corpuscula facillimè à se invicem separantur, quarum contactus cum aliis sunt paucissimi, & minimi, quales contingere solent in corpusculis Sphæricis infinite exiguis.*

Hinc fluiditatis ratio redditur.

### T H E O R. XI.

*Vis quâ corpusculum aliquod ad aliud corpus maxime propinquum attrahitur, quantitatem suam non mutat, si-ve augeatur corporis attrahentis materia, si-ve minuatur, eadem manente corporis densitate, & corpusculi distantia.*

Nam cum vires particularum Attraçtrices per minima tantum diffundantur spacia; liquet partes remotiores ad C D & E, nihil conferre ad attrahendum corpusculum A. Adeoque eadem vi versùs B trahetur corpusculum si-ve adsint hæ partes, si-ve amoveantur, si-ve denique aliæ ipsis conjungantur.



T H E O R.

## T H E O R. XII.

*Si ea sit corporis alicujus textura, ut particule ultime compositionis, per vim quandam externam (qualis est pondus eas comprimens, vel ab altero corpore proveniens ictus) à primigeniis suis contactibus paululum dimoveantur, nec interim in novos contactus commigrent, particule, per vim attractivam sese mutuo petentes, ad contactus primigenios citò redibunt: iisdem vero reduntibus particularum corpus quodvis componentium contactibus & positionibus, eadem quoque redibit corporis figura; adeoque per vim attractivam corpora, pristinas quas amiserunt figuras possunt denuo recuperare.*

Hinc Elasticitatis ratio reddi potest. Cum autem per vim Elasticam corpora, in se invicem impingentia, à se mutuo resiliant (uti demonstratum est in Lectionibus nostris Physicis) à vi attractivâ corporum oriri etiam debet eorundem à se invicem discessus.

## T H E O R. XIII.

*Quod si ea sit corporis textura, ut particule à prioribus contactibus per vim impressam dimotæ, in alios qui ejusdem sunt gradus immediate deveniant, corpus illud in pristinam figuram non se restituet.*

Hinc qualis sit textura, in qua corporum mollities consistit, intelligi potest.

## T H E O R. XIV.

*Particulæ materiæ pro diversâ ipsarum structurâ & compositione diversis pollebunt viribus attractivis, puta non erit æquè fortis attractio, cum particula datæ magnitudinis pluribus perforata sit meatibus, ac si omnino solida & vacui expers esset.*

## T H E O R. XV.

*Particularum perfectè solidarum vires attractivæ ex figuris ipsarum multum pendent, Nam si parva aliqua materiæ particula in laminam circularem indefinite exiguæ crassitudinis formetur, & corpusculum in rectâ per centrum transeunte & ad planum circuli Normali locetur; sitque distantia corpusculi æqualis decimæ parti semidiametri circuli: vis qua urgetur corpusculum tricesies minor erit, quam si materia attractans coalesceret in Sphæram, & virtus totius particulæ ex uno quasi puncto Physico diffunderetur. Quin etiam eadem circularis lamella fortius ad se trahit corpusculum, quam alia ejusdem ponderis particula, quæ in tenuem & longum formatur Cylindrum.*

## T H E O R. XVI.

*Sales sunt corpora, quorum particulæ ultimæ compositionis magnâ vi attractivâ pollent, inter quas tamen particulas plurimi interjacent meatus, particulis, quas habet aqua, ultimæ compositionis pervii: quæ igitur à salinis particulis fortiter attractæ, in eas cum impetu ruunt, & à mutuo contactu eas disjungunt, coherentiamque salium dissolvunt.*

## T H E O R.



## T H E O R. XVII.

*Si corpuscula duo viribus attractivis decrescentibus in triplicatâ aut plusquam triplicatâ ratione distantiarum se mutuo petunt; erit velocitas in se invicem impingentium infinite major quam in dato intervallo. Vide Prop. 39. Princip. Newtoni.*

## T H E O R. XVIII.


*Corporis aquâ gravioris eo usque diminui potest magnitudo, ut tandem in aquâ suspensum maneat, nec vi propriæ Gravitatis descendat.*

Hinc patet ratio, cur particulæ Salinæ, Metallicæ, & aliæ ejusmodi, in minima redactæ, in suis menstruis suspensæ hæreant.

## T H E O R. XIX.

*Corpora majora minore velocitate ad se invicem accedunt, quàm minora.*

Vis enim, quâ se mutuo petunt corpora A & B, particulis maxime propinquis tantum inest; remotiorum quippe vires nullæ sunt. Non igitur major vis adhibetur ad movenda corpora A



& B quam ad particulas *c* & *d* movendas, sed corporum eadem vi motorum velocitates sunt corporibus reciproce proportionales: unde erit velocitas quâ corpus A tendit versus B, ad velocitatem, quâ particula *c*, à corpore soluta, versus idem B tenderet, ut particula *c* ad corpus A.

Multo

Multo igitur minor est velocitas corporis A, quam foret velocitas particulæ c à corpore solutæ.

Hinc fit, ut corporum majorum motus suâ naturâ adeo languidus & lentus sit, ut ab ambiente fluido & aliis circumjacentibus corporibus plerumque impediatur. In minimis verò corpusculis viget virtus; & ab iis per plurimi producuntur effectus: tanto plus Energix minoribus inest corporibus, quam majoribus.

Hinc patet ratio istius Axiomatis Chymici, Sales non agunt nisi soluti.

### T H E O R. XX.

*Dño corpuscula sese non contingentia, adeo sibi vicina locari possunt, ut vis, quæ se mutuo petunt, vim Gravitationis multum superet.*

### T H E O R. XXI.

*Si corpusculum in fluido locatum à particulis ambientibus undique equaliter trahatur, nullus exinde oriatur corpusculi motus; quod si ab aliis particulis magis, ab aliis minus urgeatur, ad eam partem tendet corpusculum, ubi major est attractio: & motus productus inæqualitati attractionis respondebit, scilicet in majori inæqualitate major erit motus, in minore minor.*

### T H E O R. XXII.

*Corpuscula in fluido natantia & magis se invicem trahentia quam fluidi particulas interjectas, depulsis fluidi particulis ad se invicem accedent ea vi, quæ ipsorum attractio mutua superat attractionem particularum fluidi.*

T H E O R.

## T H E O R. XXIII.

*Si corpus aliquod in fluido locetur, cujus partes fluidi particulas magis ad se trahunt, quam fluidi particulae à se invicem trahunt; & sintque in corpore meatus pluri-  
mi particulis fluidi pervii, per hos meatus fluidum il-  
lud cito se diffundet; & si partium in corpore con-  
nexio non tam firma sit, quin ab impetu irruentium  
particularum superari possit, orietur exinde corporis im-  
mersi dissolutio.*

Hinc ut menstruum dato corpori dissolvendo sit idoneum, tria requiruntur, 1. Ut partes corporis particulas menstrui magis ad se trahant, quam eæ à se invicem trahuntur. 2. Ut corpus habeat meatus particulis menstrui patentes, & pervios. 3. Ut cohaerentia particularum corpus constituentium tanta non sit, quin ab impetu irruentiam particularum menstrui divelli possit. Hinc quoque constat particulas Spiritum Vini constituentes, magis à se invicem trahi, quam à particulis corporis salini in Spiritu Vini demersi.

## T H E O R. XXIV.

*Si corpuscula in fluido natantia, & se invicem potentia,  
Elastica sint, post congressum, à se mutuo resilient; &  
inde in alia corpuscula rursus impingentia, denuo re-  
flectentur: ex quo fiunt innumeri alii cum aliis cor-  
pusculis conflictus continuæque resilitiones. Per vim  
autem attractivam, continuo augetur corpusculorum  
velocitas, & sensui patebit partium motus Intestinalis;  
sed prout fortius aut imbecillius se invicem trahunt cor-  
puscula, & pro variis, qua pollent Elasticitate, vari-  
erunt hi motus, & diversis gradibus atque temporibus,  
fiunt sensibiles.*

T H E O R.

## T H E O R. XXV.

*Si corpuscula se invicem trahentia, se mutuo contingant, nullus oriatur motus ; propius enim accedere nequeunt. Si ad exiguum admodum à se invicem seponantur spatium, oriatur motus ; sed si longius distent, non majore vi se invicem trahent, quam fluidi particulas interjectas ; adeoque nullus producetur motus.*

Ex hisce principiis pendent omnia Fermentationis & Effervescentiæ Phænomena. Hinc patet ratio cur oleum Vitrioli, cui paululum aquæ immittitur, effervescit atque ebullit : corpuscula enim salina infusâ aquâ à mutuo contactu paululum dimoventur ; unde cum magis se invicem trahant quàm aquæ particulas, & cum undique æqualiter non trahuntur, motum exinde oriri necesse est.

Hinc etiam liquet ratio, cur tanta cietur ebullitio, cum limatura Chalybis mixturæ supradictæ injicitur : particulae enim chalybis magnâ pollent Elasticitate, unde valida oritur reflectio. Hinc etiam videre est, cur menstrua quædam fortiori vi agunt, citiusque corpus aliquod dissolvunt, si aquâ dilutiora fiant.

## T H E O R. XXVI.

*Si corpuscula se mutuo attrahentia vi Elasticâ careant, à se invicem non reflectuntur ; sed congeries seu moleculas particularum efficiunt, unde fiet Coagulum : & si particularum sic coacervatarum Gravitatis superet Gravitatem fluidi, succedet quoque Præcipitatio. Oriri quoque potest præcipitatio ex auctâ vel diminutâ Gravitatem menstrui, in quo natant corpuscula.*

## T H E O R. XXVII.

*Si corpusculorum sese invicem attrahentium, & in fluido natantium, ea sit figura, ut in datis quibusdam ipsorum partibus, majori vi attractivâ polleant, quam in aliis, & major sit in iisdem contactus; corpuscula illa coibunt in corpora datas figuras habentia, & inde emergent ChrySTALLISATIONES; corpusculorumque componentium figuræ, ex datâ figurâ Crystalli per Geometriam determinari possunt.*

## T H E O R. XXVIII.

*Si corpuscula magis trahantur à fluidi particulis, quam à se invicem; fiet ut quasi se mutuo fugientes, à se invicem recedant, & per omne fluidum citò diffundentur.*

## T H E O R. XXIX.

*Si inter duas fluidi particulas aliquod intercedat corpusculum, cujus binæ oppositæ facies maximis pollent viribus attractivis, hoc interjectum corpusculum particulas fluidi sibi agglutinabit; & plura istiusmodi corpuscula per fluidum diffusa ejus particulas omnes in corpus firmum compingent, fluidumque in Glaciem reducent.*

## T H E O R. XXX.

*Si corpus aliquod maximam emittat effluviarum copiam, quorum vires attractrices sunt fortissimæ; cum effluvia hæc corpori alicui leviusculo appropinquent, ipsorum vires attractrices Gravitationem corporis levioris tandem superabunt; & effluvia corpus illud ad se sursum trahent; cumque multo magis conferta sunt Effluvia, in minoribus ab emittente corpore distantiis, quam in ma-*

*coribus ; corpus leve versus densiora Effluvia semper ur-  
gebitur, donec tandem ipsi corpori effluvia emittenti ad-  
hæreat. Hinc plurima Electricitatis Phænomena ex-  
plicari possunt.*

Contra nostram hanc de viribus attractricibus doctrinam, fortasse objiciet aliquis ; Si vis hæc attractrix omni inesset materiæ ; corpora ponderosiora & plus materiæ in dato spatio habentia, plus debere attrahere, quam corpora minus Gravia, quod experientiæ repugnat. Sed huic objectioni facile responderetur. Particulæ scilicet ultimæ compositionis (quibus solis tribuitur vis attractrix) confertim juxta se invicem locatæ, possunt corpus ponderosum constituere, etiamsi ipsæ in se sint rariores, quam eæ quæ corpus leve constituunt ultimæ compositionis particulæ, à se invicem remotiores, & plures & patentiores meatus inter se habentes.

Alia multa sunt Naturæ Phænomena, quæ mihi videntur iisdem principiis explicari posse, ut ascensus succi in Plantis & Arboribus, foliorum & florum determinatæ & constantes figuræ, eorumque virtutes specificæ, &c. Multa quoque quæ in corpore animali quotidie occurrunt ; præcipue quæ ad fluidorum cursus Secretionesque spectant, ab iisdem materiæ qualitatibus pendent, & hinc morborum *Theorie* & medicamentorum effectus optime eruuntur. Quantum huic Usui inserviant hujusmodi Principia minus innotescet ex eo, quod Frater meus nunc meditatatur, Opusculo ; qui quidem Mathematicas cum Anatomicis rationes confocians in eo elaboravit, ut aliquam etiam Praxi Medicæ Lucem afferret.